



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8



Cambodia PM-i media outlet  
Voice of Democracy shibangtsü



Eoin Morgan cricket  
asaya nungi anener

VOL. XX NO. 123 (ADOK 123)

DIMAPUR SANGTENNÜ (TUESDAY)

TSÜKLAI (FEBRUARY) 14, 2023

₹ 5.00

## JP Nadda-i BJP Nagaland manifesto sayatsü

**Dimapur, February 13, 2023 (Agencies):** Bharatiya Janata Party (BJP) national president JP Nadda-i February 14, 2023 nü Nagaland nung BJP indang election manifesto sayatsü.

February 14 nü national president Nadda-i Nagaland sendangtsü aser Capital Cultural Hall, Kohima nung BJP aser parnok den yariteper NDPP indang külem sentong ka nung o jembitsü ta osang angazüker.

Iba sentong nung Chief Minister Neiphiu Rio adentsü.

Nagaland assembly elections 2023 nung BJP aser NDPP külemi yaritepa tokteper. BJP-i assembly menden 20 aser NDPP-i menden 40 nung tokteper.

Züngsem 60 agi akümba Nagaland legislative assembly

atema polling February 27 nü agitsü aser March 2, 2023 nü votes azüngtsü.

Nagaland nung Independent candidate dak alia political party 12 tokteper.

Nagaland assembly elections nung tang mezüng atema Rising People's Party (RPP), North East Democratic Front (NEDF), RPI(A) aser LJP (Ram Vilas) teloktemi shilem agir.

Nagaland Assembly election 2023 nung BJP candidate ka den tetokteper shinga mali takok nguogo.

31 Akuluto (ST) Assembly constituency nung INC candidate N. Khekashe Sumi-i pa tenüng meyipa agienba ajanga BJP candidate Kazheto Kinimi-i takok angu. Pa ya NLA 2023 nung mezüngbuba MLA lir.

## Wokha district nung election dak sendakba tatalokba kar liasü: Police

**Dimapur, February 13, 2023 (TYO):** Wokha district nung 37 Tyui AC kübok Chukitong Circle nung yimtsüng balala nung vote enoktsürtem merenshiba aser amokmerenba osangtem angazükogo ta PRO & Additional SP, Wokha-i ashi.

February 4, 2023 nü tetsürtem dak teka sangshiba aser tim masüba inyakba ken ka benoka lir aser iba nung nisung ana dak tai tonglokja lir, ta pai ashi.

Iba dak sendakba nung Wokha Police Station nung FIR ka benokogo aser tai tonglokja alir nisung anaprong puogo. Iba atema bushisüngdang arudang nisung asem tenüng temai adok aser February 10, 2023 nü par asem rongnung ka puogo, saka

ana mapu lir, ta PRO & Additional SP, Wokha-i ashi.

February 10, 2023 anepdang Seluku yimtsüng nung farm house ka rongdoktsüba osang angazük. Iba tatalokba dak sendakba nung Wokha Police-i temulung melemer nisung ana apu saka ken o benokeri tena maitsü mejangjatetba ajanga chiokogo ta paisa metetdaksü.

Ano, Koio yimtsüng nung mejangja nisung kari sepai telok dak lung agi aon aser idangji sepai kar yirua lir. Iba dak sendakba nung ken o ka benokogo.

Wokha district nung election tiptema aser tashishitsü melii agitsü atema inyaka arudar aser iba maparen nung public-i amalitepa yaritepsü mepishir ta Wokha Police-isa metetdaksü.

## Assam kübok Hojai nung menoknok anak

**Guwahati, February 13, 2023 (Agencies):** February 13, 2023 anüngdang Assam nung ano menoknok ka anak, ta National Centre for Seismology (NCS) ajanga metetdaksü.

Tanep 11:57 ako nung Richter scale nung 3.2 magnitude asadangtetba menoknok ka Hojai nung anak.

February 13 anepdang 4:15 ako meta Sikkim nung Richter scale nung 4.3 magnitude

asadangtetba menoknok ka anak. Iba menoknok ya Yuksom nung anak.

February 12 anüngdang Assam kübok Nagaon nung 4.0 magnitude nung menoknok ka anakba sülen tanü ano tesem balala ana nung menoknok anak.

February 4, 2023 anepdang 6.14 ako meta Manipur kübok Ukhrul nunga magnitude 4.0 asadangtetba menoknok ka anak.

## Ozüng alema railway tickets ayoker nisung aika apu

**Guwahati, February 13, 2023 (Agencies):** Railway Protection Force (RPF)-i Guwahati nung ozüng alema railway tickets ayokba maparen mita aodang nisung 108 puogo.

Ozüng alema ticket ayokertem ket nungi Rs 31.66 lakh alang

ticket puogo aser itemji April nungi December 2022 indang liasü.

Railway tickets alinürtemi booking windows, authorized websites aser agents nungi dang alitsü mepishir ta RPF-i metetdaksü.

## BJP aser NDPP-i Naga yimten latettsü nangzükba meinyak: Congress

**Dimapur, February 13, 2023 (TYO):** BJP aser parnok den yariteper NDPP ajanga 2018 küm 'yimten latettsü atema election' yimyim ayimoktsü saka küm pungu süiaka Indo Naga yimten tebilemtsü metembang lir ta Congress-i Hombarnü nenshia metetdaksüogo.

"BJP aser parnok den yaritepertemi Naga yimten latettsü nangzükba agi 2018 küm Nagaland nung alirtemi parnoki nem maongka ka agitsü saka parnoki kecha meinyak. Kasa nisungtemi tanga yimten latettsü jembia votes meshir. Ajisüaka parnoki kwiben yimten latettsü tenüng amer Naga nungger taginüba aser takhangba mezüngmeshitsü?" ta Social Media and Digital Platforms, AICC Chairperson Supriya Shrinete-i ashi.

"Parnoki double engine sorkar indang jembir aser mapa aika inyakba ashir saka Nagaland nung power supply majungba angudang double engine sorkar ajanga 24x7 power supply

agitsütsü atema kechi nyak ta tasüngdangba arur" ta lai ashi.

"Dimapur adener tanga district tem aser talisa Eastern Nagaland-i odangra, idakji terenlok mapa kecha mangur. Double engine sorkar ajanga mapa aika inyakba ashir saka lenmang aser infrastructure ajanga itemji tiyazü ta aitsür" ta Supriya Shrinete-isa ashi.

Assam kübok Mariani nungi Mokokchung tashi ghonda 2 ser tesadang dang agitsüla saka tang ghonda 6 agir. Külen, Nagaland BJP president Temjan Imna Along'er constituency kübok Longnak nungi Mangkolemba tashi kilometre 9 dang lir saka lenmang kanga majungba agi ghonda 2 agir, ta laisa shisem.

Chief minister Neiphiu Rio indang rongsen teimba akümbaji Nagaland state renlokba ta mezünghitsüla, ta laisa ashi.

"Eastern Nagaland nung alirtem maneni ashiochtsür aser parnoki basic amenities mangur. Ajisüaka, Congress-ibo Tuensang nung mini secretariat

ka yanglutsü nangzükker" ta lai metetdaksü.

Nagaland nung ochimashi agi asingba aser terenlok maliba ajanga lanurtem kanga timtemer. Nagaland nung world class sporting facilities mali aser sorkari lanurtem asoshi mapa adoktsü lenmang mebushir, ta Supriya-isa ashi.

Congress-i ita shia old age pension Rs 3000 tutsütsü, Tuensang nung Mini secretariat ka lapoktsü, MGNREGA sen mapang shitak nung agitsütsü, higher education atema sen temtemlok melii aputsütsü, kilen shia nem tzü tajemtsü agitsütsü, HSLC sülen compulsory vocational youth training tenzüktsü aser Old Pension Scheme meyipa reprangshitsü, ta laisa ashi.

Nagaland nung alirtemi sorkar yimsü asürtem dang asüngdangtsüla aser terenlok den tejakleni anir aoba sorkar ka akümsü atema vote enoktsütsüla, ta AICC tanishir Supriya Shrinete-isa metetdaksü.

## NDPP aser BJP teloktep akangakanga lir aser taruba sorkar akümsü

**Dimapur, February 13, 2023 (TYO):** 14 buba Nagaland Assembly election jakdang Nationalist Democratic Progressive Party (NDPP) aser Bharatiya Janata Party (BJP) tsüngda temulung masüba lir ta jembiba mapang ka nung party anati külem sangdong ka nung parnok candidate tem yaritsü mepishia metetdaksüogo.

"NDPP aser BJP tsüngda menden 40:20 lemsar yariteper aser onoki election nung takok angutsü" ta Chief Minister Neiphiu Rio-i ashi.

"Nagaland 2023 general election nung onok teloktepi takok tulu angutsü" ta pai ashi.

"Party toktsür aoba candidate tem asoshi ratateper saka ni nübertem dang NDPP aser BJP teloktep nem vote enoktsütsü mepishir. Onoki takok tulu ngur taruba sorkar akümsü" ta Rio-isa ashi.

"2023 election nung onok teloktepi takok tulu angutsü aser Chief Minister Neiphiu Rio lenisüba kübok taruba sorkar akümsü" ta Deputy Chief Minister Yanthungo Patton-isa ashi.

Onoki Nagaland nung

terenlok aser yimjung bener arutsü, ta Y Patton-isa ashi.

Nagaland nung NDPP-BJP teloktep akangakanga lir ta BJP Nagaland vice president Benjamin Yephthomi-ia Twitter nung metetdaksü.

"Nisung kari olulu prokshir saka BJP aser NDPP teloktemi taruba kümsük nung yimjung, terenlok aser tejakleni aotsü atema renema lir" ta Yephthomi-isa ashi.

"Nagaland nung party toktsür tanga party nung oa adenba candidate temi jembiba nung mamangtsüla" ta BJP national secretary Rituraj Sinha-isa ashi.

## Nagaland nung election ketdangtsürtemi Rs 36 crore tema puogo

**Dimapur, February 13, 2023 (TYO):** Nagaland Legislative Assembly 2023 indang election agitsü sangdongba anogo nungi February 12, 2023 tashi nung Central aser State Enforcement Agencies ajanga Rs. 36,99,56,169.882 puogo.

February 12, 2023 nü sen Rs. 5,00,000 aser Rs. 3,53,630 alang yi litre 1211.05 apu aser item ajak ya meyokteper Rs. 8,53,630 lir, ta Media Cell, CEO Office, Nagaland-i sangdong ka nung metetdaksü.

1. Cash = Rs. 2,84,52,365
2. IMLF (40925.65 Litres) = Rs. 4,26,40,420
3. Drugs/Narcotics (3.06 Kgs) = Rs. 26,36,80,380
4. Freebies/other items = Rs. 3,51,81,340
5. Precious Metal (Silver-0.02332 Kgs) = Rs. 1,664.882

## NTCA-i Clean Election Movement pusemer

**Dimapur, February 13, 2023 (TYO):** Nagaland Theological Colleges Association (NTCA)-i Nagaland Baptist Church Council (NBCC) kübok Clean Election Movement (CEM) pusema nungittsü metetdaksüogo.

Clean Election Movement (CEM) osang prokshitsü atema NTCA-i "Christians and Politics"

omen nung ajemdaker sentong ka agiogo.

November 5-6, 2022 tashi Zubza nung 19 buba NTCA Annual Meet alidang laishirtemi Election Commissioner of India (ECI) ajanga code of conduct benokba indang lemsatop ta Media Cell NTCA-i metetdaksü.

NTCA-isa laishirtem aser

Nagaland nung alir ajaki Clean Election Movement nung shilem agitsü ayongzük.

Parnoki nübertem dang votes mayoktsü, dual vote ID ayuba anentsü, proxy voting masütsü aser yimtsüng mesüra kibong ajungai candidate ka dang yaritsüba sangdong magütsütsü ayongzükogo.

"Yimsüsür tamajungji senso tajungi pei temeden Vote magütsüba yong lir" Anonymous

- Ungma Baptist Arogo Laishir Telongjem Clean Election Tayongzükba

### Arkakong nung NPP candidate Nuklutoshi-i lokti senden ayongzük



22 Arkakong A/C NPP candidate Nuklutoshi declaration sentong Yaongyimsen nung akadang tangokba noksa nung angur. Mokokchung, 13th February, 2023.

**Mokokchung, 13th Feb (TYO):** 22 Arkakong Assembly Constituency nungi taoba Minister, Nuklutoshi National People's Party (NPP) ticket amer election nung tokteptsü atema sangdongba sentong ka Yaongyimsen yimda 13th Feb. 2023 nü kaogo.

Pai iba sentong nung jembidang, pa BJP ticket angutsü kanga imla-a liasü saka mengutet, aji saka, National People's Party (NPP) ticket anguba ya Tsüngremer sentong südi, NPP ya national party ka dang masü saka BJP o NPP ya alliance lir, anungji, adokra amajokbo masütsü, ta metetdaksü.

2003 nungi election nung shilem agia arur asünung, joko pa dang nungi yimden tsütsü senior aikabo mali, anungji, pa adokra menden tajung atatsü imlar, ta pai ashi.

"Taoba mapang küm 10 tashi inyakdang, nübur dak rangloker

akokba tashi inyakogo, saka ano tebilemba ajakbo metongtet, anungji, mangdang aika yur taküma ni election nung noktaker asünung, nüburtemi kü dak tamang ka-a ano khen yimli agüjang", ta pai constituency sanger dang mepishia ashi.

Lanurtem atema lenmang aika lir, aser aluyimertema tensa den apet aluyimba yimya melenshia odaksütsü lenmang balala sayutsü, ta pa adokdaksüra teinyaktsü kar pai lemsatet.

Chuchuyimlang nung Nuklutoshi ya 22 Arkakong A/C nung 2003 nungi metitemi election nung toktepa arur, tang tashi nung pai anaben tashi adoka yimsü süa lir. Taoba 2018 küm pa NPF nungi toktep saka tamakok angu. Pa adokba kümji 2008-2018 tashi lir.

Tanü iba sentong nung NPP nungi tongti o jembirtemji; M. Rameshwar Singh (National General Secretary NPP, New

Delhi, MLA, Govt. of Manipur & NPP North-East In-Charge), Sushil Huldrom (National Secretary, NPP New Delhi), Audrey (CEC, State Women Wing), Yesufi Snock (Treasure Mahila, SWW), Alemla (Convener, SWW Mahila), NPP Mokokchung District tir, Tsuknung Jamiri anir party ktdangsur kari shilem agi. 22 Arkakong A/C kübok Unger, Akhoya, Kelingmen, Changtongya town, Liro, Nukshiyim aser Yaongyimsen unit nungia party osang lemsatet.

Sentong nung Chuchuyimlang village council chairman - Sanen Pongen, Chuchuyimlang Bendangli Senso Telongjem tir - C. Yapang Pongen, Takameren GB (Rionsanger Tatar Yaongyimsen) parnok den ano tangartemia shilem balala agi. Kasa declaration sentong Nukshiyim aser Liro yim nunga agia liasü.

### Ni election nung adoker nübur asoshi inyaktsü asü meinyaktsü-ar tendangang: Imjongwati Longkumer, 29th Jangpetkong NPF Candidate



29th Jangpetkong A/C nung NPF Candidate Imjongwati Longkumer-i tanu Khar yimtak pa election nung tokteptsü asoshi sangdongba sentong nung jembidang tangokba noksa

**Khar, Tsüklai/February 13(TYO)** :Naga nung ajaki jembibaji Naga lima

melenshiner, kechiba melenshinerta süra Naga lima majungba agi melenshir, anungji item majungbaji melenshita asoshi ni election-i air ta 29th Jangpetkong A/C nung NPF Candidate Imjongwati Longkumer-i tanu Khar yimtak pa election nung tokteptsü asoshi sangdongba sentong nung jembidang ashi.

Lokti aser NGO's balala aika nung dena aruogo, itemji ajanga bilemba aika inyakogo saka tzüratemabo meinyaktet, anungji ni nübur aser alima terenlok asoshi inyaktsü nkjidong nung election nung tokteper aser election nung adoker kelen political power tashi nung nübur aser alima tenzüksü kü telemungtetba

lirta 29th Jangpetkong A/C nung NPF Candidate Imjongwati Longkumer-I adenshia aliba nüburtem den pa temelungtetba lemsatet.

Politician aikati election mapang nung mangdang aika lemsatetpa teinyaktsü aika nangzüker, saka nübur dang kecha menangzüker nenoki ni adokdakang aser iba sülenji ni inyaktsü asü meinyaktsü-ar tendangangta Imjongwati Longkumer-i par constituency nüburtem dang ayimoktsü.

Kasa sentong nung Ex.Minister & Advisor to President NPF Wb.I.Imkong aser NPF Farmers Wing President Wb.Lanukaba nungertemi anir lenir aikati shilem balala agi iba sentong agi.

### Postal Ballots atema DE & DEO Kohima-i Polling Personnel shim

**Dimapur, Tsüklai/February 13 (TYO):** Representation of the People Act, 1951 indang Section 159 kübok mela aliba ama Deputy Commissioner aser District Election Officer Kohima, Shanavas C IAS ajanga 14th Nagaland Legislative Assembly 2023 asoshi aruya aliba General Election nung 8th-Western Angami A/C, 9th-Kohima Town A/C, 10th Northern Angami-I A/C, 11 Northern Angami-II A/C, 14th Southern

Angami-I A/C, aser 15 Southern Angami-II A/C atema Postal Ballots agütsütsü asoshi Attestation Officers, Assistant Videographers, Micro Observers shimogo.

DC & DEO ajanga ashiba agi, Polling Personnel ajak Election Commission of India indang deputation ama inyaktsü aser Election Commission of India taziükba, tawapangba aser yimya nung alitsü.

Iba dan sendakba nung

shima aliba ktdangsur ajanga atema training ka Deputy Commissioner, Kohima indang Conference Hall nung February 16, 2023 anüngdang 11:30 ako nungi agitsü.

Anungji Polling Personnel ama shima aliba ktdangsur ajak iba training nung arua adentsü metetdaksür, ta DC & DEO ajanga metetdaksü.

Iba training nung madener nem Act kübok tapet temerenshi agütsütsü, ta sangdong ajanga ashi.

### Nagaland aser Manipur atema Indian Army recruitment lir

**Kohima, Tsüklai/February 13 (TYO):** Agnipath scheme kübok Recruiting year 2023-24 atema Agniveers ama tebur kibong makum alirtem shimtsü asoshi Indian Army ajanga online application meshir.

Online Registration ya February 16, 2023 nü tenzüksü aser March 15, 2023 nü atemtsü. Application ya Nagaland aser Manipur nung aliba district ajunga nung alirtem indang agitsü, ta sangdong ka ajanga ashi.

Agniveers shimba ya phase ana lemsar alitsü. Phase-I Online Computer Based written Examination ya state anaprong nung teshimtet centre tem nung agitsü aser Phase-II Recruitment Rally ya Online Common Entrance Examination (CEE nung shimtetba tajungtiba candidate atema agitsü.

Candidate temi www.joinindianarmy.nic.in nung log in süa pei temsüa aliba jenjang metetsü aser personal profile yanglutsüla. Application renema agütsüba sülen website ajanga SBI portal dangi yoktsü.

Iba SBI portal nung candidate temi sen 250 den bank charges meshiba ama agütsütsüla. Sen ya Debit/Credit cards, online banking mesüra UPI amala nungi agütsütetsü.

Candidate shia email aser

mobile number shidak alitsüla, koba tarutsü nung Indian Army temi osangtsüsang agitepba nung amshitsü.

Exam centre atema candidate temi tesem pongu shimtetsüla. Candidate temi online application agütsüba mapang Aadhaar number inoktsütsüla aser mobile number den Aadhaar sendakteptsüla, ta ashi.

Candidate tem Online CEE practice atema JIA website nung link agüja lir. ARO Rangapahar ajanga candidate tem dang shidakba CEE magütsüdang khenbosa practice asütsü ayongzük.

"How to Register" aser "How to Appear for online to Appear for online CEE" indang animated video tem www.joinindianarmy.nic.in nung angutsü.

Educational qualification, physical/medical standards aser mapa telemsa indang osang tejangja www.joinindianarmy.nic.in nung angutsü.

Army Recruitment Officer, Rangapahar indang helpline number tem 03862-249012, 8974958673 & email: swarkokila@nic.in alitsü.

Candidate tem mangatetba kar lira www.joinindianarmy.nic.in nung asüngdangtsü akok, ta sangdong ajangasa ashi.

### Alongtaki nübur ajak tsüngdong ajurua khuret lemsatetpa inyaktsü. Er.J.Lanu Longchar, JDU Candidate



30th Alongtaki A/C nung Janata Dal United candidate Er.J.Lanu Longchar 14th Nagaland Legislative Assembly Election nung tokteptsü asoshi sangdongba sentong Longchem nung akadang jembiba noksa.

**Longchem, Tsüklai/February 13(TYO)** :Tanu 30th Alongtaki A/C nung Janata Dal United candidate Er.J.Lanu Longchar 14th Nagaland Legislative Assembly Election nung tokteptsü asoshi sangdongba sentong Longchem nung agiogo.

Tanu iba sentong nung 30th Alongtaki A/C nung Jana Dal United candidate Er.J.Lanu Longchar-i pa election nung toktepa indang nükjidong lemsatetpa dang Mokokchung district nung constituency 10 lir item rongnung item rongnung Alongtaki lima lenla ajak nung terenlok makaba repringteta election nung adoker itemji yanglushitsü aser nüburtem tejakleni anitettsü asoshi

noktaker ta ashi.

Er.J.Lanu Longchar-isa Alongtaki nüburtemi dang iba election nung pa adokdaksüra pai Alongtaki nung aliba yimtsüing ajaki tsüngdong oagi yangji aliba nüburtem ajurua parnok den mapang intoka nungtaktem lemsateptsü aser inyaktsüta adenshia aliba 30th Alongtaki A/C nüburtem dang nangzüka liasü.

Tanu iba kasa sentong nung Ex.Minister K.Tia Aier aser Ex.Minister Dr.Benjongliba tenatia jembiba den ano Taoba Naga Hoho Tir Chuba Ozükum aser lenirtem aikati shilem balala agi iba sentong kanga dang takokma nung longso longsoa agi.



February 13, 2023 nü Gurugram nung Delhi-Mumbai Expressway semzükba sentong nung Union Minister for Road Transport & Highways Nitin Gadkari, Haryana Chief Minister Manohar Lal, Union MoS for Road Transport & Highways V.K. Singh, Union Minister Gajendra Singh Shekhawat aser Union MoS for Planning (I/C) Rao Inderjit Singh nunger tangokba noksa nung angur.

### India aser Nepal nati tesendaktep tajungba akümtsü atema jembia

**New Delhi/Kathmandu, February 13 (Agencies):** Hombarnü India aser Nepal nati linük ana tsüingda rongsenketzüng aser terenlok tsütsü amalitepa jenjang ano tajungba akümtsü atema jembia bangjemogo.

India Foreign Secretary, Vinay Mohan Kwatra-i Nepal Foreign Secretary, Bharat Raj Paudyal na ajurua linük ana tsüingda tesendaktep asadanga liasü.

India Foreign Secretary, Kwatra-i anogo ananü atema Nepal linük yimtiba, Kathmandu semdanga lir. Iba mapang nungji pai Nepal nung sorkar tongti ketdangsertem aika ajurua senden mena onük balala nung o lemtepsü.

Kathmandu nung aliba Indian Embassy-i twitter ajanga, "Foreign Secretary Vinay Kwatra-i Nepal Foreign Secretary, Bharat Raj Paudyal ajurua India-Nepal partnership kübok lenla balala nung amalitepa inyakba jenjang asadangogo," ta metetdaksü. "Linük anapronglai linük

anaprong aser region ajak tajangzük angutsü atema maneni rongsenketzüng aser terenlok tsütsü amalitepa inyakba tashi taitba akümtsü atema bangjemtepogo," ta Indian Embassy-isa metetdaksü.

Kwatra ya tamalen Nepal nung India ambassador inyaka liasü. Pai Nepal Ato kilonser, Pushpakamal Dahal-a ajurutsü tebilemba lir.

Kwatra-isa Nepal ketdangsertem dang Nepal Ato kilonseri India semdangtsü aliba atema jembitsü. Ato kilonseri bendang linük mezüng semdangbaji India asütsü, ta metetdaksüogo.

Nepal aser India nati connectivity, power, aluyimba, health aser sobaliba lenlatem nung linük ana tsüingda tesendaktep tajungba akümtsü atema jembitsü imlar, ta Amongnü Nepal foreign ministry-i sangdong ka ajanga metetdakja liasü.

Yaküm December ita nung Pushpakamal Dahal Prachanda-i Nepal Ato kilonser

tenangzükba agi. Pai tang agi tasembenbuba Ato kilonser inyaksü atema tenangzükba agiogo.

Kwatra-isa Nepali Congress Tir, Sher Bahadur Deuba aser CPN-UML chairman, KP Sharma Oli nata ajurutsü tebilemba lir.

"'Neighbourhood First' mapatong kübok India-i Nepal den tesendaktep tajung ayur; yamaji mapang shia linük ana nungi tongti ketdangsertem ajurua senden amener," ta India Ministry of External Affairs-i metetdakja liasü.

'Neighbourhood First' ya Indian foreign policy ka lir aser iba policy kübok India-i South Asia nung aliba kidanger linüktem den rongsenketzüng, science & technology, research & education densema lenla balala nung tesendaktep tajung ayutsü atema inyaker.

India aser Nepal na arrtsü kilometer 1,850 shi lir aser arrtsülen India kübok state pongu - Sikkim, West Bengal, Bihar, Uttar Pradesh aser Uttarakhand amshir.

### Karnataka nung keyi kati tambur ka den par semchir ka nguset

**Kodagu, February 13 (Agencies):** Karnataka kübok Kodagu nung keyi kati tatalokba balala ana nung kibong ka nungi züingsem ana ngusetogo, ta Hombarnü ketdangsertemi metetdaksü.

Police-i ashiba agi, Hombarnep Kodagu district

nung Ponnampet taluk kübok Palleri yimda aalu nung aayanger arrshi küm 75 tambur ka keyi agi nguset; Amongnüa kasa keyi jagi tambusang'er semchir arrshi küm 18, Chetan nguseta liasü.

Chetan tebu, Madhu-a keyi jagi yirutsüba sülen hospital ka

nung mongdar. Par kibongji Mysuru district nungi arua alu nung aayangertem liasü.

Forest department nungi ketdangsertem aser police-i iba tesemji semdangba sülen team kati keyiji aputsü merangdar, ta police-i metetdaksü.



February 13, 2023 nü Faridabad nung 36buba Surajkund International Crafts Mela nung bendangertemi shilem agiba noksa nung angur.

### BJP lenir Dharmpal-i Valentine's Day nü nashi külemtsü ayongzük

**New Delhi, February 13 (Agencies):** Tawa Animal Welfare Board of India (AWBI)-i nüburtem dang February 14 nü 'Cow Hug Day' amongtsü ayongzükba sülen iba telemtetbaji agientsüsa aküm; iba sülen anogo ishika lir tang BJP lenir aser Uttar Pradesh nung minister katia nüburtem dang Valentine's Day nü nashi külemtsü ayongzükogo.

Uttar Pradesh nung Animal Husbandry Minister, Dharmpal Singh-i, Valentine's Day anogomong nung nashi nem chiyungtsü agüja nashi dang nungi temoatsü meshitsüla, ta ayongzük.

Paisa, "Valentine's day February 14 ya nüknürartem anogo, iba anogo nung nashi dang temeim sayua 'gud aser roti' agütsütsüla. Iba dak alia nashi tekolak aser tekong nung kongshia nashi dang nungi temoatsü meshitsüla," ta ayongzük.

Singh-isa, Vedas nung "Gavo Vishwasya Matarah" tetezü "Nashi ya alima atema tetsü," ta ashi.

"Anungji iba anogo nung ojala nashi teti tenzüktsü atema

tenangzükba agitsüla. Nashi-i agütsübatemji India nunger sobaliba nung lumiba, benjung aser külemküja ajak nung amshir. Nashi ya kanga tongtibang; yimsü tsütsülen nungi dang masü saka loktiliba tsütsü nüngdaktem nashii ataloktsür. Ibayongji Febrary 14 nü Valentine's Day nü ojala nashi dang temeim sayutsüla aser iba osangji lemsatepa ajungshitepsüla," ta minister-i ashi.

Tawa Union sorkar kübok Animal Welfare Board of India (AWBI)-ia February 14 nü Cow Hug Day amongtsü ayongzükba liasü, saka social media nung nisung aikati ibaji asayamenütsüba den külemi Centre tetuyuba nung iba telemtetbaji agiena liasü.

Mapang talangka nungi Hindu Right wing-i Valentine's Day ya anüolen aliba linüktem sobaliba lir aser iba ya ajanga India nunger sobaliba raksatsür ta ashishir.

Tamalena Hindu right wing teloktemi Valentine's Day anogo nung public aliba tesemtem nung tetsür-tebur külemi ngura amokmerena liasü.



February 13, 2023 nü Bihar Deputy Chief Minister, Tejashwi Yadav-i Ranchi nung osangbenertem den jembidang tangokba noksa nung angur.

### March 13 tashi Rajya Sabha senden thinener

**New Delhi, Tsüklai/February 13 (Agencies):** Hombarnü Rajya Sabha Chairman, Jagdeep Dhankhar-i Opposition party tem dang jashia, senden yamai magir, ta shia Rajya Sabha senden March 13 tashi thinenogo.

Hombarnep Opposition party balala nungi lenirtemi Congress MP, Rajani Patil senden nungi anenja alibaji agienang aser Adani Group ochimashi ken o bushisüngdangtsü atema Joint Parliamentary Committee (JPC) ka tentetang, ta takhangba agüja longkak aitba ajanga Chairman-i mapang tatsüka senden thinena liasü.

Congress Tir aser Opposition Lenir, Mallikarjun Kharge-i, sorkari chairman rongshir, ta tai tongloktsüba ajanga chairman kanga jashia liasü.

Congress MP, Rajani Patil-i temelaba magii senden agibaji video tangoka lemsatepba atema la budget senden piyong anentsüogo. Congress MP, Patil Budget

senden piyong anentsüba anema jembidang Kharge-i chairman aitsü.

Kharge-isa Parliament nung pai jembiba o aika chairman-i agientsüba atema chairman aitsü.

Chairman Dhankhar-i, "Metetsümonga senden nung rongrong adokdaksür, senden yamai magir. Asenoki mapang aika amajok nung indokogo. Senden nung maneni yamai rongrong adokra nüburtemi aginüba ama ni inyaksüsa akümtsü," ta metetdaksü.

Chairman-isa sabangleni arua longkak aiter opposition MP tem dang nenok-a budget senden piyong anentsütsü, ta tekümdangtsü metetdakja liasü.

Hombarnep Opposition party 14 nungi MP tem Kharge indang chamber nung senden mena Parliament nung sorkar anema nokdaksü atema jembia liasü. Iba senden nung adener party tem rongnung Congress, RJD, DMK, NCP, JDU, AAP aser Left party tem densema liasü.



## TIR YIMYIM YIMOBILEM (EDITORIAL)

DIMAPUR SANGTENNÜ, TSÜKLAI (FEBRUARY) 14, 2022

### Asenoki asenok nungdak metettsüla!

**T**ang ya nübortem alidak tesem mashi kati election nung tokteper candidate ka arur, nübortem dang nenok kechi nungdaker ta ka asungdang nunga, kecha menungdaker, sen dang terara lemjang, ta ashitsü südi. Kasaji, nübortemia na adokra, nai onok asoshi kechi inyaksütsü ta candidate mashi ka dang asungdangka asünunga, ni adokra nenok asoshi ya ya inyaksütsü ta nübortem nungdak reprangteta candidate aikatibo meshitetsü südi. Iba ama asenoki asenok nungdak memetetba jenjang ka nung asenok aika election nung shilem agiba angutsü. Aji oda, asenok ya asen nungdaka memetet aser tangari asenok tenung nung tagitsü ajak amuzüka chiaka kecha hau ta mali suwar ama peisasa pei temeten memetet timtemertem lir. Asenok tsüraburtema akhi ama alu mapa nung meranga menokdaktetter aser tanurtem aika kar zünger aser karbo mazung ta, tazünger o mazünger na prong tia kasasa kümer mapa mangu kazüba purtem aika lir. Item lanurtem nemji, ashiko, candidate-temi mapa agütsütsü nangzüksüa akok, saka kechi koma sentong ka ajanga lanurtem pei yari mapa ngua inyaksüsa mapa adokdaksütsü ta asübaji kanga tongtibang lir. Tanübo lanurtem dang government mapai aitsü ajungshitsüba ya putu dak mapet kümogo aser government mapa nung inyaker tema teimba masü ishinba dang kumadoktsü, kechiyong tanübo computer inyakyim Artificial Intelligent ajanga nisung teri inyaksüba mapa nung nisung ana dang nungdaker. Iba amaji tajangzuka government mapa inyakba dang nungibo peisasa mapa ka apiteta inyakba nungi tajangzük teimba angutsü. Aji oda, kobasa asenoki apiteta inyaksüba mapatem lir, itemji asen lima nung akaba süng, long aser süngotutem agia dena tagitsü rongsen küma yanglutettsüba asütsü. Item mapatem peisasa pei teka agi inyaksü atema, atangji, lanurtem dak temetetba aser tejangraba alitsüla aser peisasa langkabosa züsentettsü mesüra peisasa langkabosa yangluteta ayoktsü ta asüba temulungtetba alitsüla. Temetetba, tejangraba aser temulungtetba lira, ali tazung agi rongsen küma kechisarina inyaktettsü aser kecha meinyak kazüa aliba tekatem arakzuka mapa inyak tenzüksü. Iba tangatetba aser nukla yur, election nung toktepertemi lanurtem dang asen lima nung peisasa pei akok mapa tenzuka inyaka aotsü lenmang sayutettsüla. Atangji, nisung shingaia ajakbo memetet, anungji election nung toktepertemi asen lima adena orr tangar tashitemeter lima nung inyakba mapatem angazuka bener arua lanurtem nem item lenmangtemji sayutsüla. Aji oda, nungdakra asenoki lanurtem anir tangar lima nung tangar mapa inyakba sayua jajatsüla. Iba jagi asen lima nung temelenshi arutsü. Atangji, government-i akhidang amato industry ka lapoka yur yangji mapa magütsütsü, aji akhi tejen putu inyakyim, tanü putu tasen nungbo government-i lanurtem dangang industry lapoktsü lenmang tapu balala sayur aser shisatsü nung yarir aser sen aputsü lenmang bushitsür. Aji oda, government mapaji nübortemi peisasa rongsen poktetdaksüba mapatem tenzuka inyaksü atema gari lenmang yanglutsütsü aser electric tashi teperi agütsütsüba dang lir. Itemji kodang bilemdangdir, atangji, asen lima nunga government-i National aser State Highway dang masü saka asenok alu lenmang dena yanglutsü nungbo asenoki züsentetbatem alu nungi bener adoka ayoktsü tebilemtsü masütsü. Kasaji, asenok nem government-i asenok mapa inyaksü atema tesem ajaklen electric tashi peria agütsü nungbo light tashi amshia asenoki asenoksasa mapa aika tenzükettsü. Ajisüaka, yimsüsürtemia aser nübortemia asen nungdak memetetba agi, tanübo asenok süng aser long mapa inyaksü asoshi makoker, kechiyong anogo talangbalenka light marur. Itemji dang masü saka alu nung züsentetba agi tayoktsü chiyongtsü yangludi asünunga light nungdaker. Aji oda, tangarbo aluyimertem nem jenjang tajemba (power subsidy) nung alu tonga electric light bener otsür, saka asenbo alujibo yutsür kidanga light peria mangur. Aji oda, lanur ka bank nung sen apur Xerox dokan ka lapok saka light junga maruba ajanga takoksa ngur anena adok. Iba amaji yimten yimsüsürtemi mapa inyaksübo ajungshir saka mapa inyaksü tashi magütsür ta kangshiba purtemji asenok lanurtem lir. Tangbo asenoki asen nungdak metetadoker südi ta bilemer, anungji election temer mapa küma inyaksüsa, tang election nung ya candidate-temia aser nübortemi teti atema ajak nungdakba nungdak reprangteta jembitsü imlar.

## OLEMSABANG

### ELECTION NUNG NÜBUR TEINYAKTSU, TEMEDEN ASER TEMERENSHI

- I. Imkong Jamir Advocate, President, Mokokchung Bar Association.

(Yashi adk nungi...)

Taoba mapang ochi mashiba yimya agi yimsüsür shima lira tang aruya aliba sorkar tasen yanglutsu (Election) nungi tenzucker asenoki ochi tangatetba, temeden aser teinyaktsü meteta shilem agitsü nungdaker. Tanü item müdok meperi aser teraksa ajak yanglushitsü asoshi alima temzung aser ozung nung zülua aliba ama asenoki asen lenir shimtsüla. Meteta alitsu asoshi tongtipang kar:

1. Lenir shimba rongnung zungsem ka asütsü temeden Indian temzung Arla 326 (Adult Suffrage) nung zülua lir.
2. Ne temeden amshia lenir shimtsu (Right to vote) section 62 Representation of Peoples Act, 1951 nung zülua lir. Iba temeden yagi na aser ni linük nung shitakba senso tajung ka ta sayur. Anungji, lenir/yimsüsür shimdang sen mesüra rongsen yong yoka machitsüla. Asen temeden sen agi ayokba aser temzung aser ozung tetuyuba mangaba agi asen takümüji taila senso ka kümdaktsur.
3. Senso tajung ka ama asen tenung tesem (constituency) balala nung mesura kesa tesem nung anaben zülua alitsu akok saka asen vote agütsütsü temeden iba election atema khen dang ta metetdi (section 62 sub-section 3 & 4 of Representation of Peoples Act, 1951).
4. Election mapang nung candidate aser pa tenzükertemi yimya tamajung agi tangar candidate election nung menokdaksü, vote magütsütsü, amokmerem mesura teyazü tenangzükba agi mesüzüka jembitsu aser inyaktsu makok. (section 123 Representation of Peoples Act, 1951).
5. Tamangba yimsu, kin kidong, mesüra oshi oben nung ajemdaker election mapa inyaktsu memelar (section 125 Representation of Peoples Act, 1951).
6. Lenir shimba (Polling day) anogo nung nisung kari danga tangar vote agütsütsu temeden nokdang pei nisung dang vote agütsüdaktsüra temerenshi tepuokdak (imprisonment) küm ka nungi küm asem tashi ayutsu aser iba den senchi alitsü.
7. Iba ya sorkar mapa nung alir kari inyak nungbo temerenshi tepuokdak küm asem nungi küm pungo tashi ayutsu aser senchi alitsu (section 135A Representation of Peoples Act, 1951).
8. Election mapang nung sen amshiba, oset agutsüba, teyazü tenangzükba etc agi tangar mesüzüka vote agütsütsü merangba mesura tangar nisung ka nungtem mesüra teyazü tenung (personation) nung vote agütsüba atema temerenshi küm ka tepuokdak ayutsu aser senchi alitsu (section 171E, 171F aser 171D Indian Penal Code, 1860).

Item temzung aser ozung ya sensotem ajaki temolung nung yur election ajurutsu bilema atadi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Nagaland Joint Christian Forum-i Khristanem anema inyakra aitsür

**February 13, 2023:** India linük tesem ajaklen Khristanem amokmerenba aser reshikangshiba, talisa tawa ka nungi Assam densema Notrtheast nunga Khristan minorities anema inyakra mapatem Nagaland Joint Christian Forum (NJCF)-i sashia aitsür, ta NJCF tatong Tir, Rev. Dr. N. Paphino-i sangdong ka nung metetdaksü.

"Sensotem rongnung yimsü tsütsülen nungi akhümtsübutep mali. Nütsüng teimba aliba yimsü amangertemi parnok tebilemba onüktem benoktsü meranger. Yimsü balala amanger teloktem tsüngda tesempa adokdaksütsü atema parnoki asalentong yanglua joko yimjak nung inyaker," ta sangdong nung shia lir.

"Iba ama yimsüji tashiyim amshiba mesüra amokmerenba yimsü, ta ashitsü akok. Iba ama yimsü tesayuba tongtiji tesempa asütsüa akok. Kechiba nütsüng teimba aliba yimsü amangertemi minority tem indang temeden agientsüner? Iba yimsü amangertemi tesempa ajanga ozüng alema inyaksüsa onüktem jembir, ajisüaka ketdangsertemi ola madoker. Assam Chief Minister-i nangzükba ama meinyaker, kechiyong pa yimsüsüba kübok par state nung nütsüng ajema aliba tamanger teloktem timtemdaksür," ta NJCF sangdong nung shia lir.

"Asenoki linük nung minorities reshikangshi atema jembitsüadang asenok kanga kümküma alitsüla. Tangbo item ama amokmerenji asenok tonga arudar. Telemsa adokdaksüba aser tesempa tashi taitba kümdar. Yimsü nung ajemdaker politics asayar. Minorities amokmerentsü atema kangshia yimsü meyipdaksür, ta tai tongloksür. Iba denji külemi sorkar tashi nung alirtemia kecha meinyakteter, kechiyong yimsü alia amangertemi parnok anishir," ta kasa sangdong nung shia lir.

"Tang ama kanga tongtibang mapang (election) ka nung asenoki telemsa adokdaksürtem nem asenok den asayatsü memelatsüla. Asenoki clean election atema inyakra mapang nung iba tensa ajanga tangar nem maongka magidaksütsüla. Asenok dang ochimashirtem, ta ashirtemi asalentong yanglur inyaker. Asenok tashi meitdaksütsü atema parnoki asenok raksatsüner. Parnoki akokba tashi ajak inyaksü aser tesülenbo asenok nem ang tai tongloksütsü," ta NJCF-i metetdaksü.

"Asen tamang anokshidaksütsü atema asayaba politics nungi asenok kümküma alitsüla. Yimtenren aser yimsü naji balala südaksütsüla, kechiyong kati sorkar ketdangsuba maparen

inyaker aser kaji tamang jenjang indang lir. Asenok tsüngda telemsa adokdaksütsü atema asayaba politics ji asenoki memelatsüla. RSS tongti, Mohan Bhagwat-i, "... India nung alir ajak Hindu' ta jembiba oji NJCF-i sashia aitsür. Iba oji telemsa adokdaksütsü atema jembiba o lir aser yimsü tsütsü minorities-i iba oji khenyongi magizükteter. Yimsü ka madak ka tuluba südaksütsü merangba ya akhümtsübutep maliba ajanga lir aser yimsü lenir kati jembiba o memesük. Ibaji ajanga secular linük ka nung yimsü tsütsü minority tem indang yimtenren aser loktiliba temedentem agientsü meranger," ta NJCF-i metetdaksü.

"Telemsa adokdaksürtemi India ya Hindu linük ta sangdongra aser yimtenren tashi amshia linük ya Hindu linük atema inyakra tang ama election mapang nung parnok iba region (northeast)-i arutsü temeden mali. Politics ajanga linük nung telemsa adokdaksütsü atema masü saka linük longjemdaksütsü atema inyaksüla. Telemsa adokdaksürtemi tasü itdakja yimtenren party kati item tangatetbatem nung linük yimsü asütsü nükjidong lira linük renlokaksütsü tenüng amer parnok indang yimtenren manifestos benoktsü temeden mali," ta NJCF-i metetdaksü.

"Nagaland ya Khristan nütsüng teimba aliba state ka lir, aser ibaji ajanga nisung tapu balala telongjem nung litetba shisangdaksür. Yimtenren party tem aser telemsa adokdaksürtemi asen tamang dak sendakba ilatsütsü temeden mali. Khristan nütsüng teimba aliba state, Nagaland-i kodanga yimsü tsütsü majority telok mezüngmeshi masür. Tangalen nungi arurtemi tamasa asenok akhümtsübutep atema angazüktsüla; nenoki dak meimchir dak aketba awashi mangazüktetra nenok indang telemsa adokdaksüba tangatetbatem bener ozü limai arutsü temeden mali," ta kasa sangdong ajanga metetdaksü.

"Yimtenren aser politics ajanga telemsa adokdaksütsü atema meranga inyaker tem atema alima nung tesem mali. Nagaland ya Khristan majority state ka süaka onok linük nung minority lir, ajisüaka onoki linük nung minority tem temeden atema nokdaksü aser secular India tangatetba nung inyaksü. Yimsü ka amangtsüji nija ka temeden lir anungji sensotem matsüngdang ibaji kangshia benoktsü makok," ta NJCF-i metetdaksü.

"Yimsüsüba menden nung alirtemi linük nung minorities meküzmüktetra nenok dang lenirtem, ta ajatsü nenok temsüa mali. Linük temzüng kübok minorities indang temeden

balala anema inyakra aser tesem ajaklen minorities vote temeden agientsü amokmerenra na meimchirtem anema lir. Minority tem timtemba memetetsüsa na tenarong tajak aser tenük tapok süra na yimtenren nungi pilatsüla aser secular linük ka ama India yangerdaksütsüla," ta NJCF-i metetdaksü.

"Joko hopta ka sülenbo Nagaland nung election agitsü. Iba ya taruba küm 5 atema lenirtem shimtsü atema maongka lir. Ajisüaka asen meketa northeast aser India nung minority reshikangshiba ngua tensa apir kanga shisaa kaa inyaksü mapang tongogo," ta sangdong nung shia lir.

"Tang Centre nung sorkarji yimsü alia amangertemi anishir. Asenoki telemsa adokdaksürtem dang ma, ta ashitsüla. Nü shisatsü amshia asen yimsü ilatsürtem anema nokdaksü atema nü tamang amshitsüla. Iba ya Khristan teinyaksü mapa ka lir, anungji asenoki nisung peladaksüba dang nungibo Tsüngrem ang peladaksütsü atema inyaksüla," ta Nagaland Joint Christian Forum sangdong ajangasa ayongzük.

# ANOGO ABEN TSÜNGREM DEN

## Taküm Asadangba

- A. Shin 21: 13-31

"Shibai temeshiba aser yimlibilem sülen anitaker, taküm aser tetushiba angur."

A. Shin 21:21

Asenok taküm tajungba aser temaba, anaji teti nungteper. Ana tepilaji metetsü asenok kanga kümdangtsüla. Ozüng ka ama, tajung bushiba nüktong tashiji tajemba kümdaksür saka among tema alir. Asenoki temba bushiba nung yimya süpar aser tanü ibaji tongtipang kümdaksür.

Yisui asenok dang taküm nung tajungba shimbaji koda tongtipang ibaji sayur:

"Kechiaser nisungi alima ajak ajangzükter, pei taküm madokra, Pai kechi ajangazüktsü? Mesüra nisungi pei taküm melen kechi agütsütsü?" (Matt. 16:26).

Taküm shimbaji teti asoshi ta Yisui metet. Aji oda, shidakba taküm asadangbaji tajung ta pai sayu.

Temeim kibur, onok mulungsentsü teti aliba oset nung rangloksü yariang. Amen.

Item ya bilemdangang: Nai tetenzük aser tatembang indang asüngdangba shisadanger asü. Ne taküm nung koba nem mezüngbuba menden agütsür? Mathi 16:26 ji bilemdangang. Iba yagi ne dang kecha ashir?

# Impur nung Lead Like Jesus sentong agi



**Impur, February 13 (TYO):** ABAM Youth Ministry ajanga maneni ayonga Yisu Mesüka Lenisütsü (Lead Like Jesus) angazükba sentong February 10 - 12, 2023, Impur nung kanga takok ngua agiogo, ta Executive Secretary, ABAM, Rev. Dr. Mar Pongener-i sangdong ka ajanga metetdaksü.

Iba sentong ya Zone 1,2, & 3 asoshi agia liasü aser Arogo

23 nungi teintet lanurtem 115 arua dena liasü.

Iba sentong ya tanü alima kara ainba mapang ka nung Yisu mesüka lenisütsü kanga dang rongdak nüngdak, ta angateta küm pongu tashi agia arudar.

Tanü Aor lanurtem aika tangatetba tajung nung Arogotem nung lenisüba tajung agiba angur Tsüngrem tenüng asanger. Maneni iba sentong

2023 küm ana ben agia aodang ABAM YM nung lenirtemi anir Shisa Len Sayurtem ajak nem anema aliba aser shisatsü moajang, ta sarasademer, ta sangdong nung shia lir.

Iba sentong nung shisalen Sayurtemji Mr. Toshi Sanglir, Secretary, ABAM YM, Mr. Teka Imchen Coordinator, ABAM YM, aser Mrs. Shilula Imchen Asso. Pastor Women MTBA nunger liasü.



February 8, 2023 nü Christian college campus, Kentucky nung aliba Asbury University nung revival milak jangruba sülen ghonda 50 maneni revival sentong agidang tangokba noksa nung angur. February 8 anepdang Khristan college campus nung aliba Hughes Auditorium nung anepdang tekülem sentong agia liasü saka tekülem sentong tembangba sülen kaketshir ishika maneni tekülem sentong agidang ano kar arusema aden. Iba mapang nungji revival milak tulu jangrua liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Otaori**

(v) züngzünga masü (carefree)

\* **otaori** nisung nem mapa lezmüksütsüla masü.

**Otem**

(n) o tatem (concluding remark)

\* Mendenbubai **otem** shir senden shibang.

**OLONG PAITEP # 6428**

Grid for crossword puzzle #6428 with numbers 1-15 indicating starting positions.

**TIPIEN**

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushilet - (5)
- 15. Mejanga onü - (5)
- 16. Tzü shiruru ka - (4)

**LANGTSÜNGLEN**

- 1. \_ \_ \_ \_ i - (4)
- 3. Kasa masü - (6)
- 5. Nuchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_ \_ \_ \_ \_ kibur - (5)
- 13. Tebur tembar tsüngda jatepba - (4)

**OLONG PAITEP # 6427 TELANGZÜBA**

**TIPIEN :**

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.



**ALOKBA O SOBANGBA YI JEMER TAMANG NUNG NEMZÜR :**

**Alokba** : Temba, telong kaji angur südi? Aji nashi scüa na?  
**Sobangba** : Aeet, ajibo ajungli ang mesük ajai.  
**Alokba** : Mahako, aji nashi scü akoti.  
**Sobangba** : Ajungli aja, he ni menaka sayudi.Ümm.  
**Alokba** : Kwa Kwa nia menakdangdi--- Aeet ya nashi scü ato, oda majemsaba peladi!

Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....



Manipur Chief Minister N Biren Singh-i Hombarnü Imphal kübok Mantripukhri nung 'OP Sadbhavana 2022-23' ta ser sentong ka tembangtsüba angur. Iba ya Sikkim kübok Sajik Tampak nung anogo 10 nü 'organic farming education tour' aoba liasü. OP Sadbhavana nung Chandel district kübok Kana Valley nungi aluyimer 20-i Sajik Tampak nung oa aluyimba inyakyim balala angazüka liasü. Iba sentong ya HQ IGAR(S) ajanga ayongzüka agiogo.

**Nalbari district nung Valentines Day jakdang 'Section 144' benok**

**Guwahati, February 13, 2023**

(Agencies): Valentine's Day amongtsü jakdang Nalbari district administration-i February 13 nü district ajungalen Section 144 ozüing benokogo.

"Nalbari district nung tensa raksatsüsa ajiteter aser iba jagi Criminal Procedure Code indang Section 144 benokogo" ta Nalbari District Magistrate, Gitimoni Phukan-i ashi.

Iba tenokdangba mapang

nisung pungu dak tali adenshitsu memelar aser public tesemtem nung yimdong sema senzüba sentong ajak noktanger, ta pai ashi.

Maneni, public tesemtem, lenmang aser yimdong nung firecrackers dena tapoktsütem apoktsü memelar, ta District Magistrate-isa metetdaksü.

Iba tenokdangba ya Assam kübok Nalbari district nung anogo 60 atema agütsüogo.

Külen benjung mapang tensa süngjema ayutsü atema Uttar Pradesh sorkari February ita Noida nung tenokdangbatem agütsüogo. Iba ya Valentine's Day 2023 aser Mahashivratri benjungtem dak ajemdaker lir.

February 28 tashi Noida nung CrPC Section 144 benokogo aser iba tashi mangartem IPC Section 188 kübok temerenshi alitsü ta UP police-i ashi.

**BJP-i Tripura renloktsü atema akokba tashi inyakogo: PM Modi**

**Agartala, February 13, 2023**

(Agencies): Tripura nung BJP indang policy tem ajanga tajangzük manguba kibong ka danga mali Prime Minister Narendra Modi-i Hombarnü ashi.

Tripura assembly election atema nüboyimba tatembang anogo nung PM Modi-i lokti sentong ka nung o jembidang iba osang metetdaksü.

BJP-i kilir tajung ka ama iba tesem renloktsü atema mapa

ajak inyakogo, ta paisa ashi.

"Northeast nung international trade atema Agartala ya lenamng kümogo aser kobi melii iba yimti ya shishilembadak tongti ka akümtsü" ta pai ashi.

BJP-i tayang küpzükba indang masü saka temelenshi indang politics nung amanger, ta Modi-isa ashi.

"Left aser Congress teloktemi tashi angutsü atema

mapa ajak inyaker. Parnoki Kerala nung tokteper aser Tripura nungbo tesentaktep ayur" ta Modi-isa ashi.

BJP sorkar kübok nisungtemi angati ration angur, healthcare teyari, ki aser tanga teyari balala angur, ta paisa shisem.

"BJP sorkar Tripura nung sorkar tanaben akümba sülen Pradhan Mantri Awas Yojana kübok pucca ki mangurtem ajaki angutsü" ta PM Modi-isa ashi.

**Shillong nung Courtyard ta ser 5-star hotel ka lapokogo**



**Shillong, February 13, 2023**

(Agencies): Meghalaya yimtiba Shillong nung ano five-star hotel ka lapokogo.

Shillong nung February 13 nü Marriott ajanga Courtyard lapok.

"Marriott Shillong ajanga Courtyard lapokba ajanga East nung onok aliba sayur. Raliwalirtemi India nung yimti

tasentem reprangnüa aruba ajanga hotel tasen lapoker" ta South Asia, Marriott International Area Vice President, Ranju Alex-i ashi.

India nung Marriott Bonvoy portfolio rongnung Marriott, Shillong ya 26 buba lir. Iba hotel ya Shillong airport nungi kilometre 30 shi dang pilar lir. "Marriott Shillong ajanga

Courtyard lapokba atema onok kanga pelar. Onoki business aser leisure travel atema inyaker. Northeast ya Indian aser Southeast Asian sobalibatem meyoktepdak lir aser achiajemsü, alima tobur ajung aser sobaliba balala ajanga nisungtem puar" ta General Manager, Courtyard by Marriott, Shillong Tushar Nagar-ia ashi.

### Cambodia PM-i media outlet Voice of Democracy shibangtsü



**Hun Sen**  
**Phnom Penh, Tsüklai/February 13 (Agencies):** Cambodia lenir Hun Sen-i linük nung independent media outlets ishika dang anunga aliba rongnung ka shibangtsüogo. Linük nung election agitsü ita ishika dang lia iba jenjang agiogo.

VOD, mesüra Voice of Democracy-i taoba hopta otsü ka sangdongba ajanga par sorkar maitsü menentsüogo, ta Hun Sen-i Deobarnü Facebook ajanga ashi.

Iba telok yagi tatok meshiogo ajisüaka pai magizüki iba news outlet indang licence ya Hombarnü magi kümdaktsüogo.

Advocates temi ashiba agi, VOD shibangtsüba ya linük atema takoksa tulu lir, kong press züngdangteta dang lir.

News organization yimo zülurtemi BBC dang ashiba agi, police tem Hombarnü Phnom Penh nung amenoker aliba parnok indang office-i operating licence agintsü atema tetuyuba ka bener aru.

VOD indang Khmer aser English sites tema internet service agütsürtem karibo shibangtsüogo, ta staff temi

metetdaksü. "Nüburtem aoksateper lir aser tang tashi masadangteti lir," ta associate editor Ananth Baliga-i BBC dang Hombarnü ashi. "Otsü adoktsüba sülen mapang tatsüka tsüngda licence aginogo."

Deobarnü Hun Sen-i, Turkey nung menoknok agi kongshir alirtem nem teyari agütsüba indang VOD-i ocet ka atoktsüba sülen pai iba outlet shibangtsüba ta ashi. February 9 nü sangdongba osang nung \$100,000 (£83,000) package ka agütsüba atema par jabaso tambusang Hun Manet-i sign süa liasü ta shia lir.

Hun Manet ya Cambodian army indang deputy commander-in-chief lir, ajisüaka bendanger nem teyari agütsüba yabo Ato Kilonseri dang temelaba agütsütettsü. Hun Sen-i, iba amala osang prokshiba ajanga par sorkar maitsü menentsüogo, ta ashiba den tatok meshitsü khanga liasü.

News organization inyakyim achayangba telok Cambodian Center for Independent Media (CCIM)-i ashiba agi sorkar otongdar kati

agütsüba osang iba news outlet yagi sangdonga liasü aser iba osang ajanga mepetmesü adokdaksüba atema sasa bilemer.

Ajisüaka Hun Sen-i, iba telanzüba agütsüba ya agizüksü makoktsü, ta shiogo. Pai iba media outlet ya Hombarnü 10:00 ako nungbo shibangtsüba tetuyuba agütsü aser iba outlet nem teyari agütsüba bendanger lokti tentet balala dang parnok agütsür aliba sen meyipa agitsü metetdaksüogo.

CCIM nem anüolen aliba linüktem indang embassy tem aser Reporters Without Borders aser Transparency International densema rights & press freedom teloktemi tenla aika agütsüogo.

VOD yagi Khmer aser English nung osangtem sangdonger aser tawa parnok nisung alar ama amshiba ken o ka kanga takok ngua bushitogoto.

Nisung aikati ashiba agi, VOD ya news organization ishika anunga aliba rongnung kanga tongtibang liasü, aser tang iba ya shibangtsüba ya linük asoshi takoksa tulu lir.

Cambodia nung July ita election agitsü lia tang VOD shibangtsüogo. Election ya timba Hun Sen-i aniba Cambodian People's Party-i dang amokbanger agia arudar.

Arishi küm 70 tain Hun Sen yagi 1985 küm nungi Cambodia yimsüsüa arudar aser pa tang agi term trokbuba Ato Kilonser mapa abener. Kümtem tsüngda opposition yimden yimsüsürtem aika tepuokdaki yokogo mesüra mintokogo.

### Germany-i Turkey & Syria nem temporary visa agütsütsü

**Berlin, Tsüklai/February 13 (Agencies):** Turkey aser Syria nung menoknok agi kongshir alirtem Germany nung ken atema kinungertem den alitsü atema temelaba agütsütsü, ta sorkar sangdong ka ajanga metetdaksü.

"Iba ya jongdak mapang teyari agütsüba ka lir," ta German Interior Minister Nancy Faeser-i Honibarnü Bild osang kaket dang ashi. "Onoki bureaucracy kecha medeni Germany nung aliba Turkey mesüra Syria nungertem nem lendong agi kongshir aliba tesemtem nungi parnok kinungertem anir arua parnok den lidaktsüner," ta lai ashi.

Lai ashiba agi, iba inyakyim ya tanga visa inyakyim den külemi inyaksü, koba takaratiba nung inyaksangshitsü aser ita asem atema amshitettsü.

Kidanger linük ana nung menoknok agi kongshia asürtem Deobarnü tashi nung 29,000 adenba mapang ka

nung iba telemtetba agiogo. Linük anaprongla nung nisung million aika talidak maka prokshir lir.

Germany nung Turkey nungi jakzüker million 2.9 shi lidar aser parnok tesadangbo Turkey nungertem lir.

Kasa mapang nung Syria nungera aika Germany nung lidar aser parnok 924,000 shi alitsü ta asatetogoto. Taoba German Chancellor Angela Merkel-i 2015 aser 2016 küm refugee tem atema lar linük arrtsü lapoktsüba sülen Germany nung Syria nunger aika jenoka lir.

2014 küm Germany nung Syria nunger 118,000 liasü.

"Menoknok agi kongshir alirtem talidak ki maka mesüra medical teyari nungdaka lira Germany sorkari Germany nung aliba parnok kinungertem nem parnok anir arua teyari agütsüdaktsüner," ta Germany indang Foreign Minister Annalena Baerbock-i Honibarnü Twitter ajanga

metetdaksü.

Baerbock-i ashiba agi, iba inakyim tenzüka aotsü atema foreign aser interior ministry temi "task force" ka tentetogoto.

"Lendong agi kongshir alirtem atema takokba tashi visa inyakyim tezübaba kümdaktsütsü nükjidong lir. Onoki Turkey kübok foreign mission tem nung staff tem timba yokogo," ta Baerbock-isa shisem.

Visa takaratiba nung züba züba agütsütsü atema jenjang agiba ya lendong agi kongshir alirtem ajanzükdaksütsü asoshi lir, shirnok ki makai akümtsü ana nung lir mesüra lendong nung yirur temang anepalutsü nungdaka lir, ta dpa news agency-i metetdaksü.

Kasa sangdong ajangsa, iba inyakyim ya Germany nung jenoknertem aser Germany nunger mesüra permanent residence permit ngur aliba parnok kinungertem den alitsü jangrartem atema lir, ta metetdaksü.

### Sür küm ka ajungba menungra bilemteter



**Asür Tiajungla Jamir**  
**Asü : 14.2.2022**

Kodanga amatsü makokba temeim Tiala, na okok den meliaka onoki teti na ali ama menungra bilemteter. Tanu na bilemteta kinungertemi sarasadema amonger.

**Temeim kinungertem.**

### SANGDONGER

Ao Milen Adok 2178, Vol. III, Dt. 14/1/2023, Adok 2179, Vol. III Dt. 16/1/2023, Tir Yimyim adok 204/717/dt 14/1/23, nung Longkumer kidong sangdong ka nung Longchar aser Walling, Longkumer lir ta sangdongba ya tai ta item kidong Longchar aser Walling telongjemi yamai aitsür.

1. Longchar aser Walling ya nisung tenüng masü. Item ya kidong tenüng lir. Longkumeri par tebou tarensen nung item kidong ya nisung ama amshibaji tai. Kidong kaji tebou tarensen nung nisung ama amashitsü makok.
2. Longchar aser Walling ya Mongsener lir. Anungji Longkumer den tebou tarensen kecha nunga sendaktepba mali. Yimden yimli yimsüsüba, külem küja, tetsür ayak aser teptsü, sobusolem aser oshi nung Longkumer den Mongsenerji meyoktepa aser külemi mali. Longkumer den item kidong Longchar, Walling tebou tarensen nung azü (Blood) agi sendaktepa mali ta sangdonger.

**Sd/-**  
**Dr. Imkongwapang**  
**Aoli Longchar Tir**

**Sd/-**  
**Mr. Mayangremba**  
**Aoli Walling Tir**

### ALI TAYOKTSÜ LIR

Nihoto, Naga United nung ali ka tayoktsü lir.  
100 x 100 @ 150. Ali atoktsü menüngdak.  
Jenang tera ajemtsü. Contact no. 8014426873

### Tasümaimba mechi DR Congo sepai nem tasüba temerenshi agütsü

**Kinshasa, Tsüklai/February 13 (Agencies):** Tsükchir matsüngdang tasü maitba mechi Democratic Republic of Congo anüdoklen court kati par sepai tenet nem tasüba temerenshi agütsü.

Parnok ya M23 tsükchir arudang jena oa aser Sake jila ajanga jena aodang tapi agi injang khashia nisung ana asü.

Parnok okatsür temi iba obendang ano jembishitsü tebilemba lir.

Taoba küm November ita nunga sepai asem tasü maitba nung aija tasüba temerenshi agütsütsü obendang agüja liasü.

DR Congo nung tasüba temerenshi ya takum tepiyong tepuokdak ayutsü agi melener.

Taoba hopta Pope Francis-i iba linük semdangba mapang rara tatem kati arutsü atema temolungjang taroktiba nungi ayongzükaka ali rongsen peria aliba North Kivu province nung raraba tali akumer, anungji nisung meyirijang aika pei kidang nungi jena aor.

"Democratic Republic of the Congo nungi teka salang! Africa nungi teka salang! Africa

lensetba anenang, iba agentetba mine ka masü mesüra tasa tamajung amshia anisatsüba tesem ka masü," ta Pope Francis-i linük yimtiba, Kinshasa nung Mass ka agidang ashi, kong nisung million ka shi arua aden südi ta asadangteta lir.

1960s nung nüjiso anguba sülen DR Congo nung rara agi sünga lir. Kar ali rongsen agi raktepa rarar aser kar kin balala tsüngta tsükchitep aliba ajanga lir.

North Kivu nung alinük tuluka amokbangdaksüba nungi M23 tsükchir menokdangteta atema nüburtemi UN aser East African regional forces dang jashir.

Kidanger linük, Rwanda-i tsükchirtem yarir, ta DR Congo, US aser UN nung takotet nisungtemi ashir, koba Rwanda-i magizüker.

DR Congo ketdangsür temi Hutu tsükchirtem menokdangteta atema Rwanda-i küm aika nungi aija arur, shirnok karbo 1994 Rwanda genocide nung sendaka lir.

**6** SHRI ZANDI DOMTA  
Tenning AC

**9** DR. TSEILHOUTO RHUTSO  
Kohima Town AC

**17** SHRI VEVOYI WIDEO  
Chizami AC

**18** SHRI VEPRASA NYEKHA  
Chozuba AC

**22** SHRI NUKLUTOSHI  
Arkakong AC

**24** SHRI S. MAONGKABA OZK  
Angetyongpang AC

**43** SHRI A. EPHA  
Tapi AC


**48** SHRI A. NYAMNYEI  
Moka AC

**40** SHRI TSUNGRO KITHAN  
Bhandari AC

**42** SHRI M. HONANG JESS  
Wakching AC

**57** SHRI BENEI M. LAMTHIU  
Thonoknyu AC

**59** SHRI C. KIPILI SANGTAM  
Seyochung Sitimi AC



**NATIONAL PEOPLE'S PARTY**



**NAGALAND**

**"One Voice One North East"**

We stand united in our resolve to fight against corruption and make a peaceful, progressive, self-reliant and developed Nagaland.

While congratulating and praying for our candidates, we wish them courage, resilience and positive success in the ensuing election.

*"Consider it pure joy, my brothers and sisters, whenever you face trials of many kinds, because you know that the testing of your faith produces perseverance. Let perseverance finish its work so that you may be mature and complete, not lacking anything." - James 1:2-4*

**CAST YOUR VALUABLE VOTE WISELY FOR PEACE, PROGRESS & DEVELOPMENT**



**PARTY SYMBOL BOOK**

### Eoin Morgan cricket asaya nungi anener



**Tsüklai/February 13, 2023 (Agencies) :** Taoba England captain Eoin Morgan-i pa cricket asaya format ajak nungi anenba sangdongogo.

Arishi küm 36 tain asayar shiba Dublin nung aso, pa taoba küm June ita international asaya nungibo anenadoker liasü.

Morgan lenisüba nung England team-i 2019 küm World Cup akok aser one-day aser Twenty20 rankings nung temaba jenjang tongteta liasü.

Morgan-i Hombarnü ashiba agi, pai mapang talangka bilemdangba sülen iba telemtetba agiogo.

"Asaya nungi anentsü atema tang ya mapang tajung ta bilemer," ta pai shisem.

"Middlesex nungi asayatsü atema 2005 küm England-i

aruba nungi tenzükter tang tatembangsa SA20 nung Paarl Royals nungi asayaba tashi jangradema asayaogo.

"Cricket asaya nung shilem agba ajanga ni alima ajunga sema senzütetba den nisung tajung aika ajuruogo aser parnok rongnung karbo taküm tepeyong atema tembar kümogo. Linük balala nung franchise team tem nungi asayaba mapang tajangshiba tajung aika ajangshiogo koba teti menungra bilemtettsü," ta pai ashi.

Morgan, Middlesex nungi format ajak nung 275 ben asayaba mapang run 8,913 yangluogo aser iba den pa The Hundred nung London Spirit aser Indian Premier League nung Kolkata Knight Riders nunga captain mapa bener

asayaogo.

2006 nung Ireland nungi international career tenzükba sülen pa Test Cricket asayatsü atema 2009 küm England team nung aden.

Pai England team nungi Test 16 nung asayaogo saka white-ball asaya nungang pai takok tajungba nguteta liasü. 2012 küm captain mapa magizükba tsüngda England team-i 2010 küm T20 World Cup akokba team nung pa densema liasü. Iba sülen küm ana lir pa Sir Alastair Cook melena ODI captain asütsü shim.

ODI captain ama 2015 World Cup nungbo pai aniba team-i junga masayatet aser parnok knock-out stage metongteti liasü, ajisüaka küm pezü sülen parnoki Lords nung ODI world Cup final asayaba mapang New Zealand team super-over nung koka liasü.

Morgan lenisüba nung England team-i ODI 126 aser T20 72 koka liasü. Pa England nung asayatem rongnung ODI asaya nung run (6,957) timtiba yangluba asayar lir aser T20 nung captain Jos Buttler sülen tanabuba jenjang nung lir.

Maneni Morgan-i, pa asayaba tepeyong par kinunger aser medemertemi pa nongita yariba atema kanga pelaba lemsatepba den pa international aser franchise asayamungtem nung broadcasting career dak rangloker inyaksü ta ashi.

### China nunger rongnungi Wu-i mezüngbuba ATP title ka benogo

**Tsüklai/February 13, 2023 (Agencies):** Wu Yibing-i Deobarnü Dallas Open akokba sülen pa China nunger tennis asayatem rongnungi ATP title ka abenba mezüngbuba asayar kümogo.

Final asaya nung pai US nunger asayar John Isner 6-7(4) 7-6(3) 7-6(12) agi koka liasü.

Tennis asaya nung China nunger tebur asayatem tang tashi nung takok tajung nguteta asaya mali ajisüaka arishi küm 23 tain Wu-i tang iba asayamung akokba ajanga lanurtem aika ajungmesotsü imlar.

China nunger tepur asayatem rongnungi kati danga tang tashi nung professional era nung tour-level final ka danga tongteta maliasü mesüra top 10 nung aliba asayar ka danga kokdanga maliasü.

Wu shiba Hangzhou nungi lir pai tang iba alizüing anaprongla tongtetogo. Dallas nung pai America nunger world number eight asayar Taylor Fritz semi-finals nung tsükdakja liasü.

"Ni idaki ozü linük atema otsü tasen ka yangluogo," ta Wu-i sempet agütsüba sentong nung ashi.

"Ni kanga nema adanger aser fan ajak aser ozü team dang kanga pelar, shirnok ni nongittsü atema arua lir.

"Nenok medeni ni iba ya

majangzüktteta," ta paisa shisem.

Final tiebreak nung points 22 atonga service aoba mapang dang anguba sülen Isner-i ball ka court adena züktokba sülen Wu-i asaya koka liasü.

"Ni match point kwi nguteter liasü ni mejangja, saka aika liasü asütsü," ta Isner-i ashi.

"Ni asaya kokogo ta bilema liasü. "Pai ball kanga junga azünger aser pa kanga sempet tajung asayar ka lir," ta paisa ashi.

Kasa mapang nung Hombarnü Wu ya China nunger asayatem rongnungi world top 100-i aiba tanabuba asayar kümogo aser pa jenjang 58bubai atutsü imlar.

Taoba küm April ita pa top 1,000 tema liasü saka pa U.S. Open atema qualify asü aser main draw asaya ana koka 1938 küm sülen China nunger asayatem rongnungi Grand Slam ka nung third round tongteta asayaba mezüngbuba asayar aküm.

Tennis asaya nung teburtem dang nungi China tsürtemi takok tajungba ngua asaya arudar. China tsürtem rongnungi Li Na-i 2011 küm Roland Garros koka linük nungi kija asaya nung mezüngbuba Grand Slam akokba asayar aküm aser iba sülen lai 2014 kuma Australian Open koka liasü.

**BILEMDANGANG**

**"Tepela angutsüji asen dak dang keta lir."**